

RESUMO DA XUNTA DE GOBERNO DO 05 DE XUÑO DE 2020

ORDE DO DÍA

1.- Ratificación da urxencia da convocatoria. Ratifícase a urxencia.

2.- Proposta do concelleiro delegado de Mobilidade e Seguridade Cidadán relativa á aprobación das normas de xestión de permisos para as cacharelas/sardiñadas privadas por mor da celebración da noite de San Xoán. Apróbanse as normas de seguridade que rexerán par a celebración das cacharelas da noite de San Xoán 2020 en espazos privados. Estas normas fanse extensivas á celebración de cacharelas durante o mes de xuño, sexa a noite do 23 ou calquera outro día. Normas:

- Os particulares que desexen realizar unha cacharela e/ou sardiñada en terreos de propiedade privada deberán presentar a comunicación previa, segundo o modelo oficial, publicado na web do Concello, www.santiagodecompostela.gal, remitindo un correo electrónico á dirección registro@santiagodecompostela.gal, ou ben a través do banner instalado na páxina web: www.santiagodecompostela.gal dende as 00:00 horas do día 6 de xuño ata as 00:00 horas do día 21 de xuño de 2020. As persoas asinantes da comunicación previa teñen que ser maiores de idade. Con este trámite é suficiente para poder levar a cabo a actividade, sen prexuízo da responsabilidade por danos ou perdas a que houbera lugar no caso de que concorrera negligencia ou imprudencia.
- De conformidade co establecido na Orde SND/414/2020, de 16 de maio, *para la flexibilización de determinadas restriccións de ámbito nacional establecidas tras la declaración del estado de alarma en aplicación de la fase 2 del Plan para la transición hacia una nueva normalidad*, os grupos de persoas que participen na cacharela/sardiñada non poderán ser máis de 15; agás no caso de persoas convivintes. Extremaranse as medidas de hixiene de mans e medidas alternativas de protección física e de etiqueta respiratoria.
- O interesado que organice o evento deberán coidar os arredores e coñecer o número de teléfono dos Bombeiros (080) e o de Emerxencias (112).
- Se a propiedade está en zona urbana: O volume do combustible da cacharela non excederá os 2 metros de diámetro e 6 metros de perímetro, nin un metro de altura.
- En zona rural: O volume do combustible da cacharela non excederá os 3 metros de diámetro ou 9 de perímetro, nin os 3 metros de altura
- Porase especial coidado en situar a fogueira alonxada das vivendas, vehículos, instalacións e locais nos que se almacenen produtos inflamables; asemade non se situarán baixo tendidos eléctricos ou telefónicos, nin preto de masas arbóreas ou zonas vexetais susceptibles de ser queimadas..
- Prohíbese a queima de pneumáticos, plásticos, espumas de poliuretano, aceites, e en xeral de calquera substancia que ao arder desprenda fume tóxico.

- En ningún caso se botarán ao lume recipientes que conteñan líquidos inflamables ou gases a presión (sprays), aínda que estean baleiros.
-
- A fogueira permanecerá vixiada polos solicitantes ata a súa total extinción que deberá ser asegurada empapando os restos totalmente con auga, asegurándose de que as cinzas queden totalmente apagadas.
- No caso de que se levante vento que poida dificultar a vixilancia e extinción da fogueira esta deberá suspenderse ou apagarse de inmediato.
- A hora límite para rematar a celebración é as 03:30 horas da madrugada, de acordo co disposto no artigo 5.f da Lei 10/2017 de 27 de decembro de espectáculos públicos e actividades recreativas de Galicia.
- Non se ocupará ningún terreo ou espazo público.
- O desenvolvemento de celebración das cacharelas e sardiñadas cumprirá estas normas e as Ordenanzas municipais.

O cumprimento destas normas será verificado polo persoal do Servizo de Extinción de Incendios que, se é o caso, dará conta á Policía Municipal das infraccións. Lémbrese que o nº de tfno do Servizo de Bombeiros é o 080 (só emerxencias) ou o 981 542 444; e asemade, o número de Emerxencias da Xunta de Galicia é o 112.

3.- Proposta da concelleira delegada de Persoal relativa á aprobación do I Plan de contratación do concello de Santiago de Compostela para 2020. Acórdase aprobar o “I Plan de Contratación 2020 do Concello de Santiago de Compostela e publicalo no perfil do contratante do Concello sito na Plataforma de Contratación do Estado e no Portal de Transparencia da web municipal.

4.- Proposta do concelleiro delegado de Festas relativa á aprobación do expediente, gasto e apertura do procedemento de adxudicación do deseño, produción, montaxe e realización do espectáculo pirotécnico das festas do Apóstolo 2020 do Concello de Santiago de Compostela. Apróbase o expediente, así como a aprobación do gasto correspondente e a apertura do procedemento de adxudicación mediante procedemento aberto, establecéndose un tipo de licitación de 110.000,17 euros, IVE aparte. (IVE ao 21% que ascende a 23.100,04 euros).